



FM 2015/22

Randi Vestergaard Evaldsen

5. maj 2015

**Nunatta inuiattut timersornikkut unammersuarterfissaanik qulisamik "National stadion"-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamat pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat.**

(Inatsisartunut ilaasortaq Anders Olsen, Siumut)

(Siullermeerineq)

Timersorneq timigissarnerlu pinaveersaartitsillutillu peqqinnerunissamat sunniuteqarput soorlu uummalluutitut, puannut, niuni taqqakkut milittoortarnernut, gigtipalaarnermut nanertisimasarnermullu. Tamatuma saniatigut aamma timigissarneq inuiaqatigiittut ajornartorsiutitsinnut alliartuinnartumut pualavallaarnermut iluaqutaavoq.

Pingaaruteqarpoq isumagissagatsigu, innuttaasut timersornissaminnut periarfissarissaarnissaat. Timersuut uangut kalaallit nalissaqartinningisarput tassaavoq isikkamik arsarneq. Aqqusinerni, atuarfiit anitsiartarfiini meeqqat akunnerpassuit atorsinnaasarpaat isikkamik arsarlutik. Nunatsinni pissartannngorniuuttoqartillugu tamatta malinnaasarpugut. Facebookimi arsaqatigiit illersukkagut nersualaartarpagut sualummik Tuluit Nunaanni najugallit Spaniamilu. Isikkamik arsarneq allatut oqaatigalugu inuppassuit naliginnaasumik ulluini pingaaruteqarpoq.

Tamannalumi aamma pissutaavoq Demokraatit sinnerlugit ilaasortaasimasup Niels Thomsenip 2012-mi siunnersuutigimmagu, aningaasanut inatsimmi kommunimi tamani ivingaasanik qallersukkanik arsaattarfiliortiternissat pilersaarsiornissaannut immikkoortitsisoqassasoq. Taamani siunnersuut akuerineqarpoq ajoraluartumilli sumi pinnerpoq uninngatiinnarneqarsimavoq. Tassami piviusunngortinneqanngitsoorpoq.



Maannakkullu Siumut siunnersuuteqarpoq timersornikkut unammersuarterfissaanik qulisamik ”National stadion”-imik pilersitsisoqarnissaanut pilersaarusiortoqassasoq. Isumassarsiaq tamanna Demokraatini soorunami ilalerparput.

Isumaqarpugulli "National Stadion"-mik sananissaq Landskarsip kisimi akilissagaa. Suliaq pillugu pilersaarusiornermi ilaatinneqassaaq aningaasalersueriaaseq atorneqartussat. Aajukulu periarfissaasinnaasut marlussuit:

- Kommuni (qularnanngitsumik Sermersuup, stadion Nuummiissagunavimmat) sanaartornermut ingerlatsinermullu akileeqataassaaq
- Aningaasaateqarfinnut qinnuteqartoqassaaq stadionip sananissaanut
- Stadionip aqqa suliffinnut tunineqarsinnaavoq, ulluinnarni ingerlatsinermut atugassanik pissarsiniarluni.

Taamatut oqaaseqarluta siunnersuut Kulturimut, Ilinniartitaanermut, Ilisimatusarnermut Ilageeqarnermullu ataatsimiititaliamut innersuupparput.